

























白氏長慶集卷第三十二

唐太子少傅刑部尚書致仕贈尚書右僕射太原

白居易樂天著

明後學松江馬元調異甫校

律詩 凡八十二首

讀老子

言者不如知者默此語吾聞於老君若道老君是知者  
緣何自著五千文

讀莊子

莊生齊物同歸一我道同中有不同遂性逍遙雖一致





白集  
卷三十二  
鸞鳳終校勝地蟲

讀禪經

須知諸相皆非相若住無餘却有餘言下忘言一時了  
夢中說夢兩重虛空花豈得兼求果物焰如何更覓魚  
攝動是禪禪是動不禪不動卽如如

感興二首

吉凶禍福有來由但要深知不要憂只見火光燒潤屋  
不聞風浪覆虛舟名爲公器無多取利是身災合少求  
雖異匏瓜難不食大都食足早宜休

魚能深入寧憂釣鳥解高飛豈觸羅熱處先爭炙手去



悔時其奈噬臍何樽前誘得猩猩血幕上偷安鷺鷥窠  
我有一言君記取世閒自取苦人多

問鶴

烏鷺爭食雀爭窠獨立池邊風雪多盡日蹋冰翹一足  
不鳴不動意如何

代鶴荅

鷹爪攫雞雞肋折鶻拳斃鴈鴈頭垂何如斂翅水邊立  
飛上雲松棲穩枝

閒臥有所思二首

向夕褰簾臥枕琴微涼入戶起開襟偶因明月清風夜



忽想遷臣逐客心何處投荒初恐懼誰人遶澤正悲吟  
始知洛下分司坐一日安閒直萬金

權門要路是身災散地閒居少禍胎今日憐君嶺南去  
當時笑我洛中來蟲全性命緣無毒木盡天年爲不才  
大抵吉凶多自致李斯一去二疎迴

喜閒

瀟洒伊嵩下優游黃綺閒未曾一日悶已得六年閒魚  
鳥爲徒侶煙霞是往還伴僧禪閉目迎客笑開顏興發  
宵遊寺慵時晝掩關夜來風月好悔不宿香山

詩酒琴人例多薄命予酷好三事雅當此科而



所得已多爲幸斯甚偶成狂詠聊寫愧懷

愛琴愛酒愛詩客多賤多窮多苦辛中散步兵終不貴  
孟郊張籍過於貧一之已歎關於命三者何堪併在身  
只合飄零隨草木誰教凌厲出風塵榮名厚祿二千石  
樂飲閒遊三十春可得無厭時咄咄猶言薄命不如人  
寄明州于駙馬使君三絕句

有花有酒有笙歌其奈難逢親故何近海饒風春足雨  
白鬚太守悶時多

平陽音樂隨都尉留滯三年在浙東吳越聲邪無法用  
莫教偷入管絃中



何郎小妓歌喉好嚴老呼爲一串珠

嚴尚書與于駙馬詩云莫損歌喉一

串珠海味腥鹹損聲氣聽看猶得斷腸無

閒臥

薄食當齋戒散班同隱淪佛容爲弟子天許作閒人唯  
置牀臨水都無物近身清風散髮臥兼不要紗巾

春早秋初因時卽事兼寄浙東李侍郎

春早秋初晝夜長可憐天氣好年光和風細動簾帷暖  
清露微凝枕簟涼窓下曉眠初減被池邊晚坐乍移牀  
閒從蕙草侵堦綠靜任槐花滿地黃理曲管絃聞後院  
熨衣燈火映深房四時新景何人別遙憶多情李侍郎



新秋喜涼

過得炎蒸月尤宜老病身衣裳朝不潤枕簟夜相親樓  
月纖纖早波風嫋嫋新光陰與時節先感是詩人

初夏閒吟兼呈韋賓客

孟夏清和月東都閒散官體中無病痛眼下未飢寒世  
事聞常悶交游見卽歡杯觴留客切妓樂取人寬雪鬢  
隨身老雲心著處安此中殊有味試說向君看

哭崔二十四常侍

崔好酒放歌忘懷生死  
知疾不起自爲誌文

貂冠初別九重門馬鬣新封四尺墳薤露歌詞非白雪  
旌銘官爵是浮雲伯倫每置隨身鍾元亮先爲自祭文



莫道高風無繼者一千年內有崔君

奉酬侍中夏中雨後遊城南莊見示八韻

島樹閒林巒雲收雨氣殘四山嵐色重五月水聲寒老  
鶴兩三隻新篁千萬竿化成天竺寺移得子陵灘心覺  
閒彌貴身緣健更歡帝將風后待人作謝公看用里年  
雖老高陽興未闌佳辰不見召爭免趁杯盤

來詩云何處趁杯盤

送兗州崔大夫駙馬赴鎮

戚里誇爲賢駙馬儒家認作好詩人魯侯不得辜風景  
沂水年年有暮春

少年問



少年怪我問如何何事朝朝醉復歌號作樂天應不錯  
憂愁時少樂時多

問少年

千首詩堆青玉案十分酒寫白金盞迴頭却問諸年少  
作箇狂夫得了無

代琵琶弟子謝女師曹供奉寄新調弄譜

琵琶師在九重城忽得書來喜且驚一紙展看非舊譜  
四絃翻出是新聲粧賓掩抑嬌多怨散水玲瓏峭更清  
珠顆淚霑金捍撥紅粧弟子不勝情

粧賓散水皆新調名

代林園戲贈

裴侍中新修集賢宅成池館甚盛數往遊宴醉歸自戲耳



南院今秋遊宴少西坊近日往來頻假如宰相池亭好  
作客何如作主人

戲荅林園

豈獨西坊來往頻偷閒處處作遊人衡門雖是棲遲地  
不可終朝鑱老身

重戲贈

集賢池館從他盛履道林亭勿自輕往往歸來嫌窄小  
年年爲主莫無情

重戲荅

小水低亭自可親大池高館不關身林園莫妬裴家好



憎故憐新豈是人

早秋登天宮寺閣贈諸客

天宮閣上醉蕭辰  
絲管閒聽酒慢巡  
爲向涼風清景道  
今朝屬我兩三人

曉上天津橋閒望  
偶逢盧郎中張員外攜酒同  
傾

上陽宮裏曉鍾後  
天津橋頭殘月前  
空闊境疑非下界  
飄飄身侶在寥天  
星河隱映初生日  
樓閣蔥蘢半出煙  
此處相逢傾一盞  
始知地上有神仙

八月十五日夜同諸客翫月



白集 卷三十二 六  
月好共傳唯此夜境閒皆道是東都嵩山表裏千重雪  
洛水高低兩顆珠清景難逢宜愛惜白頭相勸強歡娛  
誠知亦有來年會保得晴明強健無

對晚開夜合花贈皇甫郎中

移晚按一月花遲過半年紅開杪秋日翠合欲昏天白  
露滴未死涼風吹更鮮後時誰肯顧唯我與君憐

醉遊平泉

狂歌箕踞酒樽前眼不看人面向天洛客最閒唯有我  
一年四度到平泉

題贈平泉韋徵君拾遺



箕潁千年後唯君得古風位留丹陛上身入白雲中躁  
靜心相背高低跡不同籠雞與梁燕不信有冥鴻

酬皇甫郎中對菊花見憶

愛菊高人吟逸韻悲秋病客感衰懷黃花助興方攜酒  
紅葉添愁正滿階居士暈腥今已斷仙郎杯杓爲誰排  
愧君相憶東籬下擬廢重陽一日齋

夜宴醉後留獻裴侍中

九燭臺前十二姝主人留醉任歡娛翩翩舞袖雙飛蝶  
宛轉歌聲一索珠坐久欲醒還酩酊夜深初散又踟躕  
南山賓客東山妓此會人間曾有無



和韋庶子遠坊赴宴未夜先歸之作兼呈裴員

外

員外亦愛先逃歸

促席留歡日未曛  
遠坊歸思已紛紛  
無妨按轡行乘月  
何必逃杯走似雲  
銀燭忽拋楊柳曲  
金鞍潛送石榴裙  
到時常晚歸時早  
笑樂三分校一分

集賢池荅侍中問

主人晚入皇城宿  
問客徘徊何所須  
池月幸閒無用處  
今宵能借客遊無

楊柳枝二十韻

楊柳枝洛下新聲也洛之小妓有善歌之者詞章音韻聽可動

人故賦之



小妓攜桃葉新歌蹋柳枝粧成剪燭後醉起拂衫時繡  
履嬌行緩花筵笑上遲身輕委迴雪羅薄透凝脂笙引  
簧頻煖箏催柱數移樂童翻怨調才子與妍詞便想人  
如樹先將髮比絲風條搖兩帶煙葉貼雙眉口動櫻桃  
破鬟低翡翠垂枝柔腰嫋娜莢嫩手歲蕤唳鶴晴呼侶  
哀猿夜叫兒玉敲音歷歷珠貫字纍纍袖爲收聲點釵  
因赴節遺重重遍頭別一一拍心知塞北愁攀折江南  
苦別離黃遮金谷岼綠映杏園池春惜芳華好秋憐顏  
色衰取來歌裏唱勝向笛中吹曲罷那能別情多不自  
持纏頭無別物一首斷腸詩



卷三十一  
荅皇甫十郎中秋深酒熟見憶

煙景冷蒼茫秋深夜夜霜爲思池上酌先覺甕頭香未  
暇傾巾漉還應染指嘗醅醕慙氣味琥珀讓晶光若許  
陪歌席須容散道場月終齋戒畢猶及菊花黃

老去

老去愧妻兒冬來有勸詞煖寒從飲酒衝冷少吟詩戰  
勝心還壯齋勤體校羸由來世閒法損益合相隨

送宗實上人遊江南

忽辭洛下緣何事擬向江南住幾時每過渡頭傷問法  
無妨菩薩是船師



和同州楊侍郎誇柘枝見寄

細吟馮翊使君詩  
憶作餘杭太守時  
君有一般輸我事  
柘枝看校十年遲

冬初酒熟二首

霜繁脆庭柳  
風利剪池荷  
月色曉彌苦  
鳥聲寒更多  
秋懷久寥落  
冬計又如何  
一甕新醅酒  
萍浮春水波  
酒熟無來客  
因成獨酌謠  
人間老黃綺  
地一散松喬  
忽醒還醉悠悠暮  
復朝幾年多少在  
盡付此中銷

送姚杭州赴任因思舊游二首

與君細話杭州事  
爲我畱心莫等閒  
閭里同宜勤撫恤



樓臺亦要數躋攀  
笙歌縹緲虛空裏  
風月依稀夢想間  
且喜詩人重管領  
遙飛一盞賀江山

渺渺錢塘路幾千  
想君到後事依然  
靜逢竺寺猿偷橘  
閒看蘇家女採蓮  
故妓數人憑問訊  
新詩兩首倩留傳  
舍人雖健無多興  
老校當時八九年

杭民呼余爲白舍人

寄李相公

漸老只謀歡  
雖貧不要官  
唯求造化力  
試爲駐春看

冬日平泉路晚歸

山路難行日易斜  
煙村霜樹欲棲鴉  
夜歸不到應閒事  
熱飲三杯卽是家



利仁比街作

草色斑斑春雨晴  
利仁坊北面西行  
踟躕立馬緣何事  
認得張家歌吹聲

洛陽堰閒行

洛陽堰上新晴日  
長夏門前欲暮春  
遇酒卽沽逢樹歇  
七年此地作閒人

過永寧

村杏野堯繁侶雪  
行人不醉爲誰開  
賴逢山縣盧明府  
引我花前勸一杯

往年稠桑曾喪白馬  
題詩廳壁今來尚存  
又復



感懷更題絕句

路傍埋骨蒿草合壁上題詩塵蘚生馬歿七年猶悵望  
自知無乃太多情

羅敷水

野店東頭花落處一條流水號羅敷芳魂艷骨知何在  
春草茫茫墓亦無

路逢青州王大夫赴鎮立馬贈別

大旆擁金羈書生得者稀何勞問官職豈不見光輝赫  
赫人爭看翩翩馬欲飛不期前歲尹駐節語依依

前年春予

爲河南尹  
王爲少尹



和楊同州寒食乾坑會後聞楊工部欲到知予

與工部有宿醒

夜飲歸常晚朝眠起更遲舉頭中酒後引手索茶時拂  
枕青長袖歆簪白接離宿醒無興味先是肺神知

和劉汝州酬侍中見寄長句因書集賢坊勝事

戲而問之

洛川汝海封畿接履道集賢來往頻一復時程雖不遠

百餘步地更相親

汝去洛程一宿履道集賢兩宅相去一百三十步

朱門陪宴

多投轄青眼留歡任吐茵聞道郡齋還有酒風前月下  
對何人



池上二絕

山僧對碁坐局

無人見時聞下子聲

小娃撐小艇偷採

鰕踪跡浮萍一道開

白羽扇

素是自然色圓因裁製功  
颯如松起籟飄似鶴翻空  
盛夏不銷雪終年無盡風  
引秋生手裏藏月入懷中  
麈尾斑非足蒲葵陋不同  
何人稱相對清瘦白鬚翁

五月齋戒罷宴徹樂

賓客皇甫郎中飲會

亦稀又知欲攜酒

山齋先以長句呈謝

妓房匣鏡滿紅埃酒庫封瓶生綠苔  
居士爾時緣護戒



車公何事亦停杯散齋香火今朝散開素盤筵後日開  
隨意往還君莫怪坐禪僧去飲徒來

閒園獨賞

因夢得所寄蜂鶴之  
詠因成此篇以和之

午後郊園靜晴來景物新雨添山氣色風借水精神永  
日若爲度獨遊何所親仙禽狎君子芳樹倚佳人蟻鬪  
王爭肉蝸移舍逐身蝶雙知伉儷蜂分見君臣蠢蠕形  
雖小道遙性卽均不知鵬與鷄相去幾微塵

種柳三詠

白頭種松桂早晚見成林不及栽楊柳明年便有陰春  
風爲催促副取老人心



從君種楊柳夾水意如何準擬三年後青絲拂綠波仍  
教小樓上對唱柳枝歌

更想五年後千千條麴塵路傍深映月樓上闌藏春愁  
殺閒遊客聞歌不見人

偶吟

好官病免曾三度散地歸休已七年老自退閒非世棄  
貧蒙強健是天憐韋荆南去留春服王侍中來乞酒錢  
便得一年生計足與君美食復甘眠

池上卽事

移牀避日依松竹解帶當風挂薜蘿  
鋤池心綠蘋合



粉開花面白蓮多久陰新霽宜絲管苦熱初涼入綺羅  
家醞瓶空人客絕今宵爭奈月明何

南塘暝興

水色昏猶白霞光闇漸無風荷搖破扇波月動連珠蟋  
蟀啼相應鴛鴦宿不孤小僮頻報夜歸步尚踟躕

小宅

小宅里間接疎籬雞大通渠分南巷水窓借北家風庾  
信園殊小陶潛屋不豐何勞問寬窄寬窄在心中

諭親友

適情處處皆安樂大抵園林勝市朝煩鬧榮華猶易過



優閒福祿更難銷自憐老大宜疎散却被交親歎寂寥  
終日相逢不相見兩心相去一何遙

龍門送別皇甫澤州赴任韋山人南遊

隼旗歸洛知何日鶴駕還嵩莫過春惆悵香山雲水冷  
明朝便是獨遊人

劉蘇州寄釀酒糯米李浙東寄楊柳枝舞衫偶

因嘗酒試衫輒成長句寄謝之

柳枝謾蹋試雙袖桑落初香嘗一杯金屑醅濃吳米釀  
銀泥衫穩越娃裁舞時已覺愁眉展醉後仍教笑口開  
慙愧故人憐寂寞三千里外寄歡來



詔授同州刺史病不赴任因詠所懷

同州慵不去此意復誰知誠愛俸錢厚其如身力衰可  
憐病判案何似醉吟詩勞逸懸相遠行藏決不疑徒煩  
人勸諫只合自尋思白髮來無限青山去有期野心惟  
怕鬧家口莫愁飢賣却新昌宅聊充送老資

寄楊六侍郎

時楊初授戶部  
予不赴同州

西戶最榮君好去左馮雖穩我慵來秋風一筴鱸魚膾  
張翰搖頭喚不迴

韋七自太子賓客再除秘書監以長句賀而餞

之

韋往年嘗與  
予同爲祕監



離筵莫愴且同歡共賀新恩拜舊官  
屈就商山伴麋鹿好歸芸閣狎鷓鴣  
鸞落星石上蒼苔古畫鶴廳前白露寒  
老監姓名題在壁相思試爲拂塵看

酒熟憶皇甫十

新酒此時熟故人何日來自從金谷別  
不見玉山頽疎索柳花盤寂寥荷葉杯  
今冬問氈帳雪裏爲誰開

九年十一月二十一日感事而作

其日獨遊香山寺

禍福茫茫不可期大都早退似先知  
當君白首同歸日是我青山獨往時  
顧索素琴應不暇憶牽黃犬定難追  
麒麟作脯龍爲醢何似泥中曳尾龜



卽事重題

重裘暖帽寬羶履小閣低窓深地爐身穩心安眠未起  
西京朝士得知無

將歸渭村先寄舍弟

一年年覺此身衰一日日知前事非詠月嘲風先要減  
登山臨水亦宜稀子平嫁娶貧中畢元亮田園醉裏歸  
爲報阿連寒食下與君釀酒掃柴扉

看嵩洛有歎

今日看嵩洛迴頭歎世閒榮華急如水憂患大於山見  
苦方知樂經忙始愛閒未聞籠裏鳥飛出肯飛還



詠懷

隨緣逐處便安閒，不入朝廷不住山。  
侶虛舟浮水上，身同宿鳥寄林間。  
尚平婚嫁了無累，馮翊符章封却還。  
時阿羅初嫁及同州官吏放歸處分貧家殘活計，正如身後莫相關。

詠老贈夢得

與君俱老也，自問老何如。  
眼澀夜先臥，頭慵朝未梳。  
有時扶杖出，盡日閉門居。  
懶照新磨鏡，休看小字書。  
情於故人重，跡共少年疎。  
唯是閒談興，相逢尚有餘。



白氏長慶集卷第三十三

唐太子少傅刑部尚書致仕贈尚書右僕射太原

白居易樂天著

明後學松江馬元調吳甫校

律詩

凡一百首

從同州刺史改授太子少傅分司

承華東署三分務履道西池七過春歌酒優游聊卒歲  
園林瀟灑可終身留侯爵秩誠虛貴疎受生涯未苦貧  
月俸百千官二品朝廷雇我作閒人

張良疎受並  
爲太子少傅

奉和裴令公新成午橋庄綠野堂卽事



舊徑開桃李新池鑿鳳凰只添丞相閣不改午橋庄遠  
處塵埃少閒中日月長青山爲外屏綠野是前堂引水  
多隨勢栽松不趁行年華玩風景春事看農桑花妬謝  
家妓蘭偷荀令香遊絲飄酒席瀑布濺琴床巢許終身  
穩蕭曹到老忙千年落公便進退處中央

時裴加  
中書令

自題小艸亭

新結一茅茨規模儉且卑土階全壘塊山木半留皮陰  
合連藤架葉香近菊籬壁宜藜杖倚門稱荻簾垂窻裏  
風清夜簷閒月好時留連嘗酒客勾引坐禪師伴宿雙  
棲鶴扶行一侍兒綠醅量盞飲紅稻約升炊齷齪豪家



笑酸寒富室欺陶廬閒自愛顏卷陋誰知螻蟻謀深穴  
鷦鷯占小枝各隨其分足焉用有餘爲

自詠

細故隨緣盡形衰具體微鬪閒僧尚鬧較瘦鶴猶肥老  
遣寬裁襪寒教厚絮衣馬從銜草輾雞任啄籠飛只要  
天和在無令物性違自餘君莫問何是復何非

新亭病後獨坐招李侍郎公垂

新亭未有客竟日獨何爲趁暖泥茶竈防寒夾竹籬頭  
風初定後眼闇欲明時淺把三分酒閒題數句詩應須  
置兩榻一榻待公垂



閒臥寄劉同州

軟褥短屏風昏昏醉臥翁  
鼻香茶熟後腰暖日陽中  
伴老琴長在迎春酒不空  
可憐閒氣味唯欠與君同

殘酌晚食

閒傾殘酒後煖擁小爐時  
舞看新翻曲歌聽自作詞  
魚香肥潑火飯細滑流匙  
除却慵饒外其餘盡不知

喜見劉同州夢得

紫綬白髭鬚同年二老夫  
論心共牢落見面且歡娛  
酒好攜來否詩多記得無  
應須爲春艸五馬少踟蹰

裴令公席上贈別夢得



年老官高多別離轉難相見轉難思雪銷酒盡梁王起  
便是鄒牧分散時

尋春題諸家園林

聞健朝朝出乘春處處尋天供閒日月人借好園林漸  
以狂爲態都無悶到心平生身得所未省似而今

又題一絕

貌隨年老欲何如興遇春牽尚有餘遙見人家花便入  
不論貴賤與親疎

家園三絕

滄浪峽水子陵灘路遠江深欲去難何侶家池通小院



臥房階下插魚竿

籬下先生時得醉  
甕閒吏部暫偷閒  
何如家醞雙魚榼  
雪夜花時長在前

鴛鴦怕捉竟難親  
鸚鵡雖籠不著人  
何侶家禽雙白鶴  
閒行一步亦隨身

老來生計

老來生計君看取  
白日遊行夜醉吟  
陶令有田唯種黍  
鄧家無子不留金  
人間榮耀因緣淺  
林下幽閒氣味深  
煩慮漸銷虛白長  
一年心勝一年心

早春題少室東巖



三十六峰晴雪銷嵐氣生月留三夜宿春引四山行遠  
草初含色寒禽未變聲東巖最高石唯我有題名

早春即事

眼重朝眠足頭輕宿酒醒陽光滿前戶雪水半中庭物  
變隨天氣春生逐地形北簷梅晚白東岼柳先青葱壠  
拙羊角松巢墮鶴翎老來詩更拙吟罷少人聽

歎春風兼贈李二十侍郎二絕

樹根雪盡催花發池岸冰消放草生唯有鬚霜依舊白  
春風於我獨無情

道場齋戒今初畢酒伴歡娛久不同不把一杯來勸我



無情亦得侶春風

春來頻與李二賓客郭外同遊因贈長句

風光引步酒開顏送老消春嵩洛閒朝蹋落花相伴出  
暮隨飛鳥一時還我爲病叟誠宜退君是才臣豈合閒  
可惜濟時心力在放教臨水復登山

二月二日

二月二日新雨晴草芽菜甲一時生輕衫細馬春年少  
十字津頭一字行

春和令公綠野堂種花

綠野堂開占物華路人指道令公家令公桃李滿天下



何用堂前更種花

清明日登老君閣望洛城贈韓道士

風光煙火清明日歌哭悲歡城市閒  
何事不隨東洛水誰家又葬北邙山  
橋車馬長無已下渡舟航亦不閒  
冢墓纍纍人擾擾遼東悵望鶴飛還

三月三日

畫堂三月初三日絮撲窓紗燕拂簷蓮子數杯嘗冷酒  
柘枝一曲試春衫階臨池面勝看鏡戶映花藂當下簾  
指點樓南玩新月玉鈎素手兩纖纖

雨中聽琴者彈鶴操



雙鶴分離一何苦連陰雨夜不堪聞莫教遷客孀妻聽  
嗟嘆悲啼詎殺君

酬鄭二司錄與李六郎中寒食日相過同宴見

贈二人並  
是同年

偶因令節會嘉賓況是平生心所親迎接須矜疎傳老  
祇供莫笑阮家貧杯盤狼藉宜親夜風景闌珊欲過春  
相對喜歡還悵望同年只有此三人

喜楊六侍御同宿

岸幘靜言明月夜匡牀閒臥落花朝二三月裏饒春睡  
七八年來不早朝濁水清塵難會合高鵬低鷄各逍遙



眼看又上青雲去更卜同衾一兩宵

殘春詠懷贈楊暮巢侍郎

位逾三品日

太子少傅  
官三品

年過六旬時

予今年  
六十五

不道官班

下其如筋力衰猶憐好風景轉重舊親知少壯難重得  
歡娛且強爲興來池上酌醉出袖中詩靜話開襟久閒  
吟放盞遲落花無限雪殘鬢幾多絲莫說傷心事春翁  
易酒悲

閒居春靜

閒泊池州靜掩扉老身慵出客來稀愁應暮雨留教住  
春被殘鶯喚遣歸揭甕偷嘗新熟酒開箱試著舊生衣



冬裘夏葛相催促垂老光陰速侶飛

春盡日天津橋醉吟偶呈李尹侍郎

宿雨洗天津無泥未有塵初晴迎早夏落照送殘春興  
發詩隨口狂來酒寄身水邊行嵬峩橋上立逡巡疎傳  
心情老吳公政化新三川徒有主風景屬閒人

池上逐涼二首

青苔地上消殘暑綠樹陰前逐晚涼輕屐單衫薄紗帽

淺池平岸渾

毗意切

藤床簪纓怪我情何薄泉石諳君味

甚長徧問交親爲老計多言宜靜不宜忙

窻閒睡足休高枕水畔行來上小船棹遣禿頭奴子撿



茶教纖手侍兒煎  
門前便是紅塵地  
林外無非赤日天  
誰信好風清簟上  
更無一事但翛然

香山避暑二絕

六月灘聲如猛雨  
香山樓北暢師房  
夜深起凭闌干立  
滿耳潺湲滿面涼

紗巾草履竹疎衣  
晚下香山蹋翠微  
一路涼風十八里  
臥乘籃輿睡中歸

老夫

七八年來遊洛都  
三分遊伴二分無  
風前月下花園裏  
處處唯殘个老夫  
世事勞心非富貴  
人生實事是歡娛



白集 卷三十三  
誰能逐我來閒坐時共酣歌傾一壺

香山卜居

老須爲老計老計在抽簪山下初投足人閒久息心亂  
藤遮石壁絕澗護雲林若要深藏處無如此處深

無長物

莫訝家居窄無嫌活計貧只緣無長物始得作閒人青  
竹單床簾烏紗獨幅巾其餘皆稱是亦足奉吾身

宿香山寺酬廣陵牛相公見寄

來詩云唯羨東都白居易月明

香積問禪師時牛相  
三表乞退有詔不許

手札八行詩一篇無由相見但依然君匡聖主方行道



我是空王正坐禪支許徒思遊白月藥龍未放下青天  
應須且爲蒼生住猶去懸車十四年

牛相公今年五十七

以詩代書寄戶部楊侍郎勸買東隣王家宅

勸君買取東隣宅與我衡門相並開雲映高峯當戶牖  
月和伊水入池臺林園亦要聞閒置筋力應須及健迴  
莫學因循白賓客欲年六十始歸來

贈談客

上客清談何亶亶幽人閒思自寥寥請君休說長安事  
膝上風清琴正調

初入香山院對月

大和六年秋作



老住香山初到夜秋逢白月正圓時從今便是家山月  
試問清光知不知

題龍門堰西澗

東畝菊叢西畝柳柳陰煙合菊花開一條秋水琉璃色  
闊狹纔容小舫迴除却悠悠白少傳何人解入此中來  
秋霖中奉裴令公見招早出赴會馬上先寄六

韻

雨闇三秋日泥深一尺時老人平旦出自問欲何之不  
是尋醫藥非干送別離素書傳好語絳帳赴佳期續借  
桃花馬催迎楊柳姬只愁張錄事罰我怪來遲



嘗酒聽歌招客

一甕香醪新插芻雙鬟小妓薄能謳管絃漸好新教得  
羅綺雖貧免外求世上貪忙不覺苦人間除醉卽須愁  
不知此事君知否君若知時從我遊

八月三日作

露白月微明天涼景物清草頭珠顆冷樓角玉鉤生氣  
爽衣裳健風疎砧砵鳴夜衾香有思秋簾冷無情夢短  
眠頻覺宵長起暫行燭凝臨曉影蟲怨欲寒聲槿老花  
先盡蓮凋子始成四時無了日何用嘆衰榮

病中贈南隣覓酒



頭痛牙疼三日臥  
妻看煎藥婢來扶  
今朝自校擡頭語  
先問南隣有酒無

曉眠後寄楊戶部

輭綾腰褥薄絲被  
涼冷秋天穩暖身  
一覺曉眠殊有味  
無因寄與早朝人

秋雨夜眠

涼冷三秋夜安閒  
一老翁臥遲燈滅  
後睡美雨聲中灰  
宿溫瓶火香添暖  
被籠曉晴寒未起  
霜葉滿階紅

喜夢得自馮翊歸洛兼呈令公

上客新從左輔迴  
高陽興助洛陽才  
已將四海聲名去



又占三春風景來甲子等頭憐共老文章敵手莫相猜  
鄒枚未用爭詩酒且飲梁王賀喜杯

齋戒滿夜戲招夢得

紗籠燈下道場前白日持齋夜坐禪無復更思身外事  
未能全盡世閒緣明朝又擬親杯酒今夕先聞理管絃  
方丈若能來問疾不妨兼有散花天

和令公問劉賓客歸來稱意無之作

水南秋一半風景未蕭條阜蓋迴沙苑藍輦上洛橋閒  
賞黃菊酒醉唱紫芝謠稱意那勞問請錢不早朝

酬夢得窮秋夜坐即事見寄



焰細燈將盡聲遙漏正長  
老人秋向火小女夜縫裳  
菊悴籬經雨萍銷水得霜  
今冬暖寒酒先擬共君嘗

偶于維陽牛相公處覓得箏箏未到先寄詩來

走筆戲荅

來詩云但愁封寄  
去魔物或驚禪

楚匠饒巧思秦箏多好音  
如能會一面何啻直雙金玉  
柱調須品朱絃染要深  
會教魔女弄不動是禪心

荅夢得秋庭獨坐見贈

林梢隱映夕陽殘  
庭際蕭疎夜氣寒  
霜艸欲枯蟲思急  
風枝未定鳥棲難  
容衰見鏡同惆悵  
身健逢杯且喜歡  
應是天教相煖熱  
一時垂老與閒官



長齋月滿攜酒先與夢得對酌醉中同赴令公之宴戲贈夢得

齋宮前日滿三旬酒榼今朝一拂塵乘興還同訪戴客  
解醒仍對姓劉人病心湯沃寒灰活老面花生朽木春  
若怕平原怪先醉知君未慣吐車茵

奉酬淮南牛相公思黯見寄二十四韻

每對雙關分敘

兩意

白老忘機客牛公濟世賢鷗棲心戀水鵬舉翅摩天累  
就優賢秩連操造化權貧司甚瀟灑榮路自喧闐望苑  
三千日台階十五年是人皆棄忘何物不陶甄

居易三任官寮



皆分司東都于茲入載思黯出藍輦遊嵩嶺油幢鎮海

入外內凡十五年皆同平章事

藍輦遊嵩嶺油幢鎮海

墉竹篙撐釣艇金甲擁樓船雪夜尋僧舍春朝列妓筵

長齋儼香火密宴簇花鈿自覺閒勝鬧遙知醉笑禪是

非分未定會合杳無緣我正思楊府君應望洛川西來

風嫋嫋南去雁連連日落龍門外潮生瓜步前秋同一

時盡月共兩鄉圓舊春交歡在新文氣調全慙無白雪

曲難荅碧雲篇金谷詩誰賞蕪城賦衆傳珠應晒魚目

鉛未伏龍泉遠許驚魔物深情寄酒錢霜紈一百疋玉

柱十三絃

思黯遠寄箏來先寄詩云但愁封寄去魔物或驚禪仍與酒資同至

楚醞來樽

裏秦箏送耳邊何如紅燭下相對一陶然



吳祕監每有美酒獨酌獨醉但蒙詩報不以飲

招輒此戲酬兼呈夢得

蓬山仙客下煙霄對酒唯吟獨酌謠不怕道狂揮玉爵

記云飲王爵者弗揮

亦曾乘興換金貂

吳監前任散騎常侍

君稱名士誇能

飲

王孝伯云但常無事讀離騷痛飲只可稱名士

我是愚夫可見招

獨酌謠云愚夫子不

招

賴有伯倫爲醉伴何愁不解傲松喬

酬夢得霜夜對月見懷

淒清冬夜景搖落長年情月帶新霜色磴和遠雁聲暖  
憐爐火近寒覺被衣輕枕上酬佳句詩成夢不成

初冬月夜得皇甫澤州手札并詩數篇因遣報



書偶題長句

清冷玉韻兩三章落箔銀鈎七八行心逐報書懸鴈足  
夢尋來路遶羊腸水南空地多明月山北天寒足早霜  
履道所居在水南澤州在太行之北地也最恨潑醅新熟酒迎冬不得共君  
嘗

雪中酒熟欲攜訪吳監先寄此詩

新雪對新酒憶同傾一杯自然須訪戴不必待延枚

雪賦

云延枚陳榻無辭解表門莫懶開笙歌與談笑隨事自將  
來

酬令公雪中見贈訝不與夢得同相訪



雪似鵝毛飛散亂人披鶴氅立徘徊鄒生枚叟非無興  
唯待梁王召即來

題酒甕呈夢得

若無清酒兩三甕爭向白鬚千萬莖趨蘖銷愁真得力  
光陰催老苦無情凌煙閣上功無分伏火爐中藥未成  
更擬共君何處去且來同作醉先生

迂叟

一辭魏闕就商賓散地閒居八九春初時被目爲迂叟  
近日蒙呼作隱人冷煖俗情諳世路是非閒論任交親  
應須繩墨機關外安置疎愚鈍滯身



洛下閒居寄山南令狐相公

已收身向園林下猶寄名於祿仕閒不鋟嵇康彌懶靜  
無金疎傅更貧閒支分門內餘生計謝絕朝中舊往還  
唯是相君忘未得時思漢水夢巴山

惜春贈李尹

春色有時盡公門終日忙兩衙但不闕一醉亦何妨芳  
樹花團雪衰翁鬢撲霜知君倚年少未苦惜風光

對酒勸令公開春遊宴

時泰歲豐無事日功成名遂自由身前頭更有忘憂日  
向上應無快活人自去年來多事故從今日去少交親



宜須數數謀歡會好作開成第二春

與夢得偶同到敦詩宅感而題壁

山東纔副蒼生願

漢書云山東出相

川上俄驚逝水波履道淒

涼新宅第

敦詩宅在履道修造初成

宣城零落舊笙歌

崔家妓樂多歸宣州也

園荒唯有新堪採門冷兼無雀可羅今日相逢偶同到  
傷心不是故經過

楊六尚書新授東川節度使代妻戲賀兄嫂二

絕

劉綱與婦共昇仙弄玉隨夫亦上天何似沙哥領崔嬈  
碧油幢引向東川



金花銀碗饒君用

過合切

畫羅衣儘嬾裁  
覓得黔婁爲

妹壻可能空寄蜀茶來

閒遊即事

郊野遊行熟村園次第過  
驀山尋浥澗蹋水渡伊河  
寒食青青草春風瑟瑟波  
逢人共杯酒隨馬有笙歌  
勝事經非少芳辰過亦多  
還須自知分不老擬如何

六十六

七十欠四歲此生那足論  
每因悲物故還且喜身存  
安得頭長黑爭教眼不昏  
交游成拱木婢僕見曾孫  
瘦覺腰金重衰憐鬢雪繁  
將何理老病應付與空門



池上早春即事招夢得

老更驚年改閒先覺日長晴熏榆莢黑春添柳稍黃雲  
破山呈色冰融水放光低平穩舩舫輕暖好衣裳白角  
三升榼紅茵六尺牀偶遊難得伴獨醉不成狂我有中  
心樂君無外事忙經過莫慵懶相去兩三坊

因夢得題公垂所寄蠟燭因寄公垂

照梁初日光相似出水新蓮艷不如却寄兩條君令取

明年雙引入中書

宰相入朝舉雙  
燭餘官各一

令公南庄花柳正盛欲偷一賞先寄二篇

最憶樓花千萬朵偏憐堤柳兩三株擬提社酒攜村妓



擅入朱門莫怪無

映樓苑花拂吳垂柳庄上最勝絕處故舉以爲對

可惜亭臺閒度日欲偷風景暫遊春只愁花裏鶯饒舌

飛入宮城報主人

春夜宴席上戲贈裴淄州

九十不衰真地仙

謂淄州也

六旬猶健亦天憐

予自謂也

今年相

遇鶯花月此夜同歡歌酒筵四座齊聲和絲竹兩家隨分鬪金鈿留君到曉無他意圖向君前作少年

贈夢得

年顏老少與君同眼未全昏耳未聾放醉臥爲春日伴  
趁歡行入少年叢尋花借馬煩川守弄水偷船惱令公



聞道洛城人盡怪呼爲劉白二狂翁

晚春欲攜酒尋沈四著作先以六韻寄之

病容衰慘澹芳景晚蹉跎無計留春得爭能奈老何篇

章慵報荅杯讌喜經過顧我酒狂久負君詩債多

沈前後惠

詩十餘首春來多醉竟未酬荅今故云兩

敢辭攜綠蟻只願見青娥最憶陽

關唱真珠一串歌

沈有謳者善唱西出陽關無故人詞

開成二年三月三日河南尹李待價以人和歲

稔將禊於洛濱前一日啓留守裴令公令公

明日召太子少傅白居易太子賓客蕭籍李

仍叔劉禹錫前中書舍人鄭居中國子司業



裴惲河南少尹李道樞倉部郎中崔晉司封  
員外郎張可續駕部員外郎盧言虞部員外  
郎苗愔和州刺史裴儔淄州刺史裴洽檢校  
禮部員外郎楊魯士四門博士談弘纂等一  
十五人合宴于舟中由斗亭歷魏堤抵津橋  
登臨泝汭自晨及暮簪組交映歌笑閒發前  
水嬉而後妓樂左筆視而右壺觴望之若仙  
觀者如堵盡風光之賞極遊泛之娛美景良  
辰賞心樂事盡得于今日矣若不記錄謂洛  
無人晉公首賦一章鏗然玉振顧謂四座繼



而和之居易舉酒抽毫奉十二韻以獻

座上作

三月艸萋萋黃鶯歇又啼柳橋晴有絮沙路潤無泥襖  
事修初畢遊人到欲齊金鈿耀李絲管駭鳬鷺轉听  
迴船尾臨流簇馬蹄開於楊子渡蹋破魏王堤妓接謝  
公宴詩陪荀令題舟同李膺汎醴爲穆生攜水引春心  
蕩花牽醉眼迷塵街從鼓動煙樹任鴉棲舞急紅罽凝  
歌遲翠黛低夜歸何用燭新月鳳樓西

同夢得寄賀東西川二楊尚書

龍節對持真可愛雁行相接更堪誇兩川風景同三月  
千里江山屬一家魯衛定知連氣色潘楊亦覺有光華



予與二公  
皆忝姻眷

應憐洛下分司伴  
冷宴閒遊老看花

喜小樓西新柳抽條

一行弱柳前年種  
數尺柔條今日新  
漸欲拂他騎馬客  
未多遮得上樓人  
須教碧玉羞眉黛  
莫與紅桃作麴塵  
爲報金堤千萬樹  
饒伊未敢苦爭春

酒醒尋夢得

料合同惆悵花殘酒亦殘  
醉心忘老易醒眼別春難  
獨出雖慵懶相逢定喜歡  
還攜小蠻去試覓老劉看

小蠻  
酒榼

名也

感事



服氣崔常侍

晦叔

燒丹鄭舍人

居中

常期生羽翼那忽化灰

塵每遇淒涼事還思潦倒身唯知趣杯酒不解鍊金銀  
睽適三尸性慵安五藏神無憂亦無喜六十六年春

和裴令公南庄一絕

裴云野人不識中書令喚作陶家與謝家

陶廬僻陋那堪比謝墅幽微不足攀何似嵩峯三十六  
長隨申甫作家山

宅西有流水墻下構小樓臨翫之時頗有幽趣

因命歌酒聊以自娛獨醉獨吟偶題五絕

伊水分來不自由無人解愛爲誰流家家拋向墻根底  
唯我栽蓮越小樓



水色波文何所似麴塵羅帶一條斜莫言羅帶春無主  
自置樓來屬白家

日灑水光搖素壁風飄樹影拂朱欄皆言此處宜絃管  
試奏霓裳一曲看

霓裳試罷唱梁州紅袖斜翻翠黛愁應是遙聞勝近聽  
行人欲過盡迴頭

獨醉還須得歌舞自娛何必要親賓當時一部清商樂  
亦不長將樂外人

偶作

簾昇出卽忘歸舍柴戶昏猶未掩關聞客病時慙體健



見人忙處覺心閒清涼秋寺行香火和暖春城拜表還  
木雁一篇須記取致身才與不才閒

同夢得酬牛相公初到洛中小飲見贈

時牛相公薨罷

楊州節度就拜東都留守

淮南揮手拋紅旆洛下迴頭向白雲政事堂中老丞相  
制科場裏舊將軍宮城煙月饒全占關塞風光請半分  
詩酒放狂猶得在莫欺白叟與劉君

幽居早秋閒詠

幽僻囂塵外清涼水木閒臥風秋拂簟步月夜開關且  
得身安泰從他世險難但休爭要路不必入山川軒鶴



留何用泉魚放不還誰人知此味臨老十年閒

和令狐僕射小飲聽阮咸

掩抑復淒清非琴不是箏還彈樂府曲別占阮家名古  
調何人識初聞滿座驚落盤珠歷歷搖珮玉琤琤似勸  
杯中物如含林下情時移音律改豈是昔時聲

燒藥不成命酒獨醉

白髮逢秋王丹砂見火空不能留姹女爭免作衰翁賴  
有杯中綠能爲面上紅少年心不遠只在半酣中

送盧郎中赴河東裴令公幕

別時暮雨洛橋畔到日涼風汾水波荀令見君應問我



爲言秋草閉門多

送李滁州

君於覺路深留意我亦禪門薄致功未悟病時須去病  
已知空後莫依空白衣臥病嵩山下阜蓋行春楚水東  
誰道三年千里別兩心同在道場中

長齋月滿寄思黯

一日不見如三月一月相思如七年侶隔山河千里地  
仍當風雨九秋天明朝齋滿相尋去挈榼抱衾同醉眠  
冬夜對酒寄皇甫十

霜殺中庭艸氷生後院池有風空動樹無葉可辭枝十



白集 卷三十三  
月苦長夜百年強半時新開一瓶酒那得不相思

歲除夜對酒

衰翁歲除夜對酒思悠然艸白經霜地雪黃欲雪天醉  
依香枕坐慵傍暖爐眠洛下閒來久明朝是十年



白氏長慶集卷第三十四

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

律詩

凡七十五首

司徒令公分守東洛移鎮北都一心勤王三月  
成政形容盛德實在歌詩况辱知音敢不先  
唱輒奉五言四十韻寄獻以抒下情

天上中台正人閒一品高

中書令上應中台司徒官一品

休明值堯舜

勲業過蕭曹始擅文三捷

進士及第博學制策連登三科

終兼武六韜



動人名赫赫憂國意忉忉盪蔡擒封豕

吳元濟也

平齊斬巨

鼇

李師道也

兩河收土宇四海定波濤寵重移官籥

自東都留守授

北京留守

恩新換闔旌保釐東宅靜

周公召公東治洛宅

守護北門牢

晉國封疆潤并州士馬豪胡兵驚赤幟邊鴈避烏號令

下流如水仁霑澤似膏路喧歌五袴軍醉感單醪將校

森貔武賓僚儼雋髦客無煩夜析吏不犯秋毫神在臺

駘助魂亾獫狁逃德星銷彗孛霖雨滅腥臊烽戍高臨

代關河遠控洮汾雲晴漠漠朔吹冷飈飈豹尾交衙戟

蚪鬚捧佩刀通天白犀帶照地紫麟袍羌管吹楊柳燕

姬酌蒲

普模切

荀

蒲荀酒出太原

銀含鑿落盞金屑琵琶槽遙想



從軍樂應忘報國勞紫微留北闕

中書令即紫微令也

綠野寄東

臯

綠野堂在東都午橋莊也

忽憶前時會多慙下客叨清宵陪讌話

美景從遊遨花月還同賞琴詩雅自操朱絃拂宮徵洪

筆振風騷近竹開方丈依林架桔槔春池八九曲畫舫

兩三艘徑滑苔粘屐潭深水沒篙綠絲縈岸柳紅粉映

樓桃

皆午橋莊中佳境

爲穆先陳醴

居易每十齋日在會常蒙以二勑湯代酒也

招

劉共籍糟

劉夢得也

舞鬟金翡翠歌頸玉螭蟠盛德終難過

明時豈易遭公雖慕張范

張良范蠡

帝未捨伊臯眷戀心方

結踟躕首已搔鸞凰上寥廓燕雀住蓬蒿欲獻文狂簡

徒煩思鬱陶可憐四百字輕重抵鴻毛



和東川楊慕巢尚書府中獨坐感戚在懷見寄

十四韻

慕巢感戚虔州弟喪逝感已之榮盛有歸洛之意故叙而和之也

我是知君者君今意若何窮通時不定苦樂事相和東

蜀歡殊渥西江歎逝波只緣榮貴極翻使感傷多行斷

風驚鴈

慕巢及楊九楊十前年來兄弟三人各在一處

年侵日下發片心休慄

戚雙鬢已蹉跎紫綬黃金印青幢白玉珂老將榮補貼

愁用道銷磨外府饒盃酒中堂有綺羅應湏引滿飲何

不放狂歌錦水通巴峽香山對洛河將軍馳鉄馬少傳

步銅駝深契憐松竹高情憶薜蘿懸車年甚遠未敢故

相過



分司洛中多暇數與諸客宴遊醉後狂吟偶成

十韻因招夢得賓客兼呈思黯奇章公

性與時相遠身將世兩忘寄名朝士籍寓興少年場老  
豈無談笑貧猶有酒漿隨時求伴侶逐日用風光數數  
遊何爽些些病未妨天教榮啓樂人恕接輿狂改業爲  
逋客移家住醉鄉不論招夢得兼擬誘奇章要路風波  
險權門市井忙世間無可戀不是不思量

小歲日喜談氏外孫女孩滿月

今旦夫妻喜他人豈得知自嗟生女晚敢訝見孫遲物  
以稀爲貴情因老更慈新年逢吉日滿月乞名時桂燎



熏花果蘭湯洗玉肌懷中有可抱何必是男兒

閒吟贈皇甫郎中親家翁

新與皇甫結姻

誰能嗟嘆光陰暮豈復憂愁活計貧忽忽不知頭上事  
時時猶憶眼中人早爲良友非交勢晚接嘉姻不失親  
最喜兩家婚嫁畢一時抽得尚平身

夢得臥病攜酒相尋先以此寄

病來知少客誰可以爲娛日晏開門未秋寒有酒無自  
宜相慰問何必待招呼小疾無妨飲還須挈一壺

訓思黯戲贈

同用狂字

鍾乳三千兩金釵十二行妬他心似火欺我鬢如霜

思黯



自誇前後服鍾乳三千兩甚得力而歌舞之妓頗多來詩戲予羸老故戲答之  
慰老資歌笑銷  
愁仰酒漿眼看狂不得狂得且湏狂

又戲答絕句

來句云不是道公狂不  
得恨公逢我不教狂

狂夫與我世相忘故態些些亦不妨縱酒放歌聊自樂  
接輿爭解教人狂

令狐相公與夢得交情素深眷予分亦不淺一  
聞薨逝相顧泫然旋有使來得前月未歿之  
前數日書及詩寄贈夢得哀吟悲歎寄情於  
詩詩成示予感而繼和

緘題重疊語殷勤存歿交親自此分前月使來猶理命



今朝詩到是遺文銀鉤見晚書無報玉樹埋深哭不聞  
最感一行絕筆字尚言千萬樂天君

令狐與夢得手札後云見樂天君爲

伸千萬之誠也

洛下雪中頻與劉李二賓客宴集因寄汴州李

尚書

水南水北總紛紛雪裏歡遊莫厭頻日日闌來唯老病  
年年少去是交親碧氊帳煖梅花濕紅燎爐香竹葉春  
今日鄒枚俱在洛梁園置酒召何人

看夢得題答李侍郎詩詩中有文星之句因戲

和之



看題錦繡報瓊瓊俱是人天第一才好遣文星守疆次  
亦須防有客星來

閒適

祿俸優饒官不卑就中間適是分司風光煖助遊人處  
雨雪寒供飲宴時肥馬輕裘還且有麴歌薄酒亦相隨  
微躬所要今皆得只是蹉跎得校遲

戲答思黯

思黯有能箏者以此戲之

何時得見十三絃待取無雲有月天願得金波明似鏡  
鏡中照出月中仙

訓裴令公贈馬相戲

裴詩云君若有心求逸足  
我還留意在名姝蓋引妾



換馬戲意亦  
有所屬也

安石風流無奈何欲將赤驥換青娥不辭便送東山去  
臨老何人與唱歌

新歲贈夢得

暮齒忽將及同心私自憐漸衰宜減食已喜更加年紫  
綬行聯被籃輦出比肩與君同甲子歲酒合誰先

早春持齋答皇甫十見贈

正月晴和風氣新紛紛已有醉遊人帝城花笑長齋客  
三十年來負早春

戲贈夢得兼呈思黯



霜鬢莫欺今老矣

傳曰今老矣無能爲也

一杯莫笑便陶然陳郎

中處爲高戶裴使君前作少年

陳商郎中酒戶消滴裴洽使君年九十餘顧

我獨狂多自哂與君同病最相憐月終齋滿誰開素湏擬奇童置一筵

早春憶遊思黯南莊因寄長句

南莊勝處心常憶借問軒車早晚遊美景難忘竹廊下  
好風爭奈柳橋頭冰消見水多於地雪霽看山盡入樓  
若待春深始同賞鶯殘花落却堪愁

訓皇甫十早春對雪見贈

漠漠復雰雰東風散玉塵明催竹窓曉寒退柳園春綠



白集 卷三十四  
醞香堪憶紅爐煖可親忍心三兩日莫作破齋人

奉和思黯自題南莊見示兼呈夢得

謝家別墅最新奇山展屏風花夾籬曉月漸沉橋脚底  
晨光初照屋梁時臺頭有酒鶯呼客水面無塵風洗池  
除却吟詩病閒客此中情狀更誰知

送蘄春李十九使君赴郡

可憐官職好文詞五十專城未是遲曉日鏡前無白髮  
春風門外有紅旗郡中何處堪攜酒席上誰人解和詩  
唯共交親開口笑知君不及洛陽時

自題酒庫



野鶴一辭籠虛舟長任風送愁還開處移老入閒中身  
更求何事天將富此翁此翁何處富酒庫不曾空劉仁軌詩  
云天將富此翁以一醉爲富也

### 寒食日寄楊東川

不知楊六逢寒食作底歡娛過此辰  
兜率寺高宜望月嘉陵江近好遊春  
蠻旗似火行隨馬蜀妓如花坐遶身  
不使黔婁夫婦看誇張富貴向何人

### 醉後聽唱桂花曲

詩云遙知天上桂花孤試問嫦娥更有無月中幸有閒田

地何不中央種兩株此曲韻怨切聽輒感人故云爾

桂華詞意苦丁寧唱到嫦娥醉便醒  
此是人閒腸斷曲



莫教不得意人聽

訓夢得以予五月長齋延僧徒絕賓友見戲十

韻

賓客懶逢迎  
翛然池館清  
簷間空鷺語  
林靜未蟬鳴  
葷血還休食  
杯觴亦罷傾  
三春多放逸  
五月暫修行  
香印朝煙細  
紗燈夕焰明  
交游諸長老  
師事古先生  
竺乾古先生也  
禪後心彌寂  
齋來體更輕  
不唯忘肉味  
兼擬滅風情  
蒙以聲聞待  
難將戲論爭  
虛空若有佛  
靈運恐先成

奉和裴令公三月上巳日遊太原龍泉憶去歲

襍洛見示之作

依來體雜言



去歲暮春上巳共泛洛水中流今歲暮春上巳獨立香  
山下頭風光閒寂寂旌旆遠悠悠丞相府歸晉國太行  
山礙并州鵬背負天龜曳尾雲泥不可得同遊

又和令公新開龍泉晉水二池

舊有潢汚泊今爲白水塘

詩云方塘  
含白水

笙歌聞四面樓閣

在中央春變煙波色晴添樹木光龍泉信爲美莫忘午

橋莊

早夏曉興贈夢得

窻明簾薄透朝光臥整巾簪起下牀背壁燈殘經宿焰  
開箱衣帶隔年香無情亦任他春去不醉爭銷得晝長



白集 卷三十四  
一部清商一壺酒與君明日煖新堂

春日題乾元寺上方最高峯亭

危亭絕頂四無鄰見盡三千世界春但覺虛空無障礙  
不知高下幾由旬迴看官路三條線却望都城一片塵  
賓客暫遊無半日王侯不到便終身始知天造空閒境  
不爲忙人富貴人

奉和思黯相公以李蘇州所寄太湖石奇狀絕  
倫因題二十韻見示兼呈夢得

錯落復崔嵬蒼然玉一堆峯駢仙掌出罅坼劒門開峭  
頂高危矣盤根下壯哉精神欺竹樹氣色壓亭臺隱起



磷磷狀凝成瑟瑟胚

鋪杯切

廉稜露鋒刃清越扣瓊瑰

姑回

切岌業

魚怯切

形將動巍峩勢欲摧奇態潛鬼怪靈合蓄

雲雷黛潤霑新雨班明點古苔未曾棲鳥雀不肯染塵

埃尖削琅玕笋窪

鳥瓜切

剡

鳥官切

瑪瑙疊海神移碣石畫

障簇天台在世爲尤物如人負逸才渡江一葦載入洛

五丁推出處雖無意升沉亦有媒

媒爲李蘇州

拔從水府底

置向相庭隈對稱吟詩句看宜把酒杯終隨金礪用不

學玉山頽疎傳心偏愛園公眼屢迴共嗟無此分虛管

太湖來

居易與夢得俱典姑蘇而不獲此石

奉和思黯相公雨後林園四韻見示



新晴夏景好復此池邊地煙樹綠含滋水風清有味便  
成林下隱都忘門前事騎吏引歸軒始知身富貴

晚夏閒居絕無賓客欲尋夢得先寄此詩

魚笋朝食飽蕉紗暑服輕欲爲窓下寢先傍水邊行晴  
引鶴雙舞秋生蟬一聲無人解相訪有酒共誰傾老更  
諳時事閒多見物情只因劉與白二叟自相迎

寄李蘄州

下車書奏龔黃課動筆詩傳鮑謝風江郡謳謠誇杜母  
洛城歡會憶車公笛愁春盡梅花裏簾冷秋生薤葉中

蘄州出好笛  
不道蘄州歌酒少使君難稱與誰同



憶江南詞三首

此曲亦名謝秋娘每首五句

江南好風景舊曾諳日出江花紅似火春來江水綠如藍能不憶江南

二

江南憶最憶是杭州山寺月中尋桂子郡亭枕上看潮頭何日更重遊

三

江南憶其次憶吳宮吳酒一杯春竹葉吳娃雙舞醉芙蓉早晚復相逢

酬思黯相公晚夏雨後感秋見贈



暮來朝去無歇期  
炎涼闇向雨中移  
夜長祇合愁人覺  
秋冷先應瘦客知  
兩幅彩箋揮逸翰  
一聲寒玉振清辭  
無憂無病身榮貴  
何故沉吟亦感時

久雨閒悶對酒偶吟

淒淒苦雨闇銅駝  
嫋嫋涼風起漕

在到切

河自夏及秋晴

日少從朝至暮悶  
時多鷺臨池立  
窺魚笱

舉後切

隼傍林

飛拂雀羅賴有杯中神  
聖物百憂無奈十分何

雨後秋涼

夜來秋雨後  
秋氣颯然新  
團扇先辭手  
生衣不著身  
更添砧引思  
難與簾相親  
此境誰偏覺  
貧閒老瘦人



酬夢得早秋夜對月見寄

吾衰寡情趣君病懶經過其奈西樓上新秋明月何庭  
蕪淒白露池色澹金波况是初長夜東城砧杵多

題謝公東山障子

賢愚共在浮生內貴賤同趨群動閒多見忙時已衰病  
少聞健日肯休閒鷹饑受縲先結切從難退鶴老乘軒亦  
不還唯有風流謝安石拂衣攜妓入東山

謝楊東川寄衣服

年年衰老交遊少處處蕭條書信稀唯有巢兄不相忘  
春茶未斷寄秋衣



懷詠寄皇甫朗之

老大多情足往還  
招僧待客夜開關  
學調氣後衰中健  
不用心來鬧處閒  
養病未能辭薄俸  
忘名何必入深山  
與君別有相知分  
同置身於木鴈閒

東城晚歸

一條叩杖懸龜榼  
雙角吳童控馬銜  
晚入東城誰識我  
短靴低帽白蕉衫

與夢得沽酒閒飲且約後期

少時猶不憂生計  
老後誰能惜酒錢  
共把十千沽一斗  
相看七十欠三年  
閒徵雅令窮經史  
醉聽清吟勝管絃



更待菊黃家醞熟共君一醉一陶然

與牛家妓樂雨夜合宴

玉管清絃聲旖旎翠釵紅袖坐參差  
兩家合奏洞房夜八月連陰秋雨時  
歌臉有情凝睇久舞腰無力轉裙遲  
人閒歡樂無過此上界西方卽不知

和楊六尚書喜兩弟漢公轉吳興魯士賜章服

命賓開宴用慶恩榮賦長句見示

華筵賀客日紛紛劒外歡娛洛下聞  
朱紱寵光新照地彤襜喜氣遠凌雲  
榮聯花萼詩難和樂助埴簾酒易醺  
感美料應知我意今生此事不如君



自詠

鬚白面微紅醺醺半醉中  
百年隨手過萬事轉頭空  
臥疾瘦居士行歌狂老翁  
仍聞好事者將我畫屏風

夢得相過援琴命酒因彈秋思  
偶詠所懷兼寄繼之符價二相府

閒居靜侶偶相招小飲初酣  
琴欲調我正風前弄秋思  
君應天上聽雲韶雲韶雅曲上多與宰相同聽之時和始見陶鈞力物  
遂方知盛聖朝  
雙鳳棲梧魚在藻  
飛沉隨分各逍遙

九月八日訓皇甫十兄贈

君方對酒綴詩章  
我正持齋坐道場  
處處追遊雖不去



時時吟詠亦無妨  
霜蓬舊髮三分白  
露菊新花一半黃  
惆悵東籬不同醉  
陶家明日是重陽

慕巢尚書書云  
室人欲爲置一歌者  
非所安也  
以詩相報因而和之

東川已過二三春  
南國湏求一兩人  
富貴大都多老大  
歡娛大半爲親賓  
如愁翠黛應堪重  
買笑黃金莫訴貧  
他日相逢一杯酒  
樽前還要落梁塵

### 杪秋獨夜

無限少年非我伴  
可憐清夜與誰同  
歡娛牢落中心少  
親故凋零四面空  
紅葉樹飄風起後  
白鬚人立月明中



前頭更有蕭條物老菊衰蘭三兩叢

憑李睦州訪徐凝山人

凝卽睦州之民也

郡守輕詩客鄉人薄釣翁解憐徐處士唯有李郎中

蘇州故吏

江南故吏別來久今日池邊識我無不獨使君頭似雪

華亭鶴死白蓮枯

蓮鶴皆蘇州同來

得楊湖州書頗誇撫民接賓縱酒題詩因以絕

句戲之

豈獨愛民兼愛客不唯能飲又能文白蘋洲上春傳語

柳使君輸楊使君



天宮閣秋晴晚望

洛城秋霽後梵閣暮登時此日風煙好今秋節候遲霞  
光紅泛艷樹影碧參差莫慮言歸晚牛家有宿期

酬夢得暮秋晴夜對月相憶

霽月光如練盈庭復滿池秋深無熱後夜淺未寒時露  
葉團荒菊風枝落病梨相思懶相訪應是各年衰

同夢得和思黯見贈來詩中先叙三人同讌之  
歡次有歎鬢髮漸衰嫌孫子催老之意因酬  
妍唱兼吟鄙懷

醉伴騰騰白與劉何朝何夕不同遊留連燈下明猶飲



斷送樽前倒卽休催老莫嫌孫稚長加年湏喜鬢毛秋  
教他伯道爭存活無子無孫亦白頭

聽歌

管妙絃清歌入雲老人合眼醉醺醺誠知不及當年聽  
猶覺聞時勝不聞

三年冬隨事鋪設小堂寢處稍以穩煖因念衰  
病偶吟所懷

小宅非全陋中堂不甚卑聊堪會親族足以貯妻兒煖  
帳迎冬設溫爐向夜施裘新青兔褐褥軟白猿皮似鹿  
眠深草如雞宿穩枝逐身安枕席隨事有屏帷病致衰



殘早貧營活計遲由來蠶老後方是蠶成時

初冬卽事呈夢得

青氊帳煖喜微雪紅地爐深宜早寒走筆小詩能和不  
淡醅新酒試嘗看僧來乞食因留宿客到開樽便共歡  
臨老交親零落盡希君恕我取人寬

自罷河南已換七尹每一入府悵然舊遊因宿

內廳偶題西壁兼呈韋尹常侍

每日河南府依然自到家杯嘗七尹酒

七尹酒味不樹同備嘗之矣

看十年花

卽府中新菓園

且健須歡喜雖衰莫歎嗟迎門無故

吏侍坐有新娃煖閣謀宵宴寒庭放晚衙主人留宿定



一任夕陽斜

天寒晚起引酌詠懷寄許州王尚書汝州李常

侍

葉覆冰池雪滿山日高慵起未開關寒來更亦無過醉  
老後何由可得閒四海故交唯許汝十年貧健是樊蠻  
相思莫忘櫻桃會一放狂歌一破顏

櫻桃時數與許汝  
二君歡會甚樂

四年春

柳梢薰嫩草芽新又入開成第四春近日放慵多不出  
少年嫌老可相親分司吉傳頻過舍致仕崔卿擬卜鄰  
時輩推遷年事到往還多是白頭人



白髮

白髮生來三十年而今鬚鬢盡皤然歌吟終日如狂叟  
衰疾多時似瘦仙八戒夜持香火印三光朝念藥珠篇  
其餘便被春收拾不作閒遊卽醉眠

追歡偶作

追歡逐樂少閒時補貼平生得事遲何處花開曾後看  
誰家酒熟不先知石樓月下吹蘆管金谷風前舞柳枝  
十聽春啼變鶯舌三嫌老醜換蛾眉樂天一過難知分  
猶自咨嗟兩鬢絲

蘆管柳枝已下皆  
十年來洛中之事

公垂尚書以白馬見寄光潔穩善以詩謝之



翩翩曰馬稱金羈領綴銀花尾曳絲毛色鮮明人盡愛  
性靈馴善主偏知免將妾換慙來處試使奴牽欲上時  
不蹶不驚行步穩最宜山簡醉中騎

西樓獨立

身著白衣頭似雪時時醉立小樓中路人迴顧應相怪  
十一年來見此翁

書事詠懷

官俸將生計雖貧豈敢嫌金多輸陸賈酒足勝陶潛

詩云常苦酒不足

牀煖僧敷坐樓晴妓卷簾日遭齋破用

每月常持

春賴閨如添

是年閏正月也

老向歡彌切狂於飲不廉十年



閒未足亦恐涉無厭

酬夢得比萱草見贈

來篇云唯君比萱草相見可忘憂

杜康能散悶萱草解忘憂  
借問萱逢杜何如  
白見劉老衰勝少  
天閒樂笑忙愁試問同年內何人得白劉

問皇甫十

苦樂心由我窮通命任他  
坐傾張翰酒行唱接輿歌  
榮盛傍看好優閒自適多  
知君能斷事勝負兩如何

早春獨登天宮閣

天宮日煖閣門開  
獨上迎春飲一杯  
無限遊人遙怪我  
緣何最老最先來



送蘇州李使君赴郡二絕句

憶拋印綬辭吳郡衰病當時已有餘  
今日賀君兼自喜  
八迴看換舊銅魚  
予自罷蘇州及  
茲換八刺史也

二

館娃宮深春日長

館娃宮今  
靈巖寺也

烏鵲橋高秋夜涼

烏鵲橋  
在蘇州

南風月不知人世變  
奉君直似奉吳王

長洲曲新詞

茂苑綺羅佳麗地  
女湖桃李艷陽時  
心奴已死胡容老  
後輩風流是阿誰

白氏長慶集卷第三十四























